

son vray nom, renouvellement d'hommage & de reconnoissance que le malin esprit tire de tēps en tēps de ces pauvres Peuples, cōme des esclaves de sa puissance.

Maintenant ce pauvre hōme est tout rauy, de se voir en l'estat où il est. Il va fouvent se representant qu'il est comme vn prisonnier de guerre de ces quartiers, eschappé de la main de ses ennemis; pendant que ses compagnons attachez aux liens, sont à la veille de souffrir d'horribles tourmens: ce sont ses propres pensées. Il a tout d'vn coup rompu avec toutes les superstitions du pays; & en tous les festins où il a esté inuité depuis son baptesme, il a genereusement gardé la liberté que nous demandons de nos Chrestiens en telles rencontres: & par tout où il se trouue, il fait ouuertemēt profession de ce qu'il est. Il a voulu que la volonté du defunct fut executée, touchant la petite Therese sa niepce, [24] & qu'elle fut menée à Quebec, & mise entre les mains des Meres Vrfulines, resolu à tout ce que Dieu en ordonneroit. Et en vn mot, il nous donne tout contentement.

Ce bon homme iusques icy n'estoit pas beaucoup considerable parmi ceux de sa Nation: mais depuis qu'il s'est fait Chrestien il a esté regardé de tout autre œil par les Capitaines mesmes, & les plus considerables de son bourg, qui l'ont voulu mettre dans les affaires. Or vn iour comme il se fut engagé à nous rendre quelque seruice (c'estoit pour faire le voyage de la Nation Neutre, & afsister au retour les Peres qui y estoient en Misions) s'estant en mesme temps rencontré qu'on le voulut employer pour les affaires du public, il tascha de ioindre l'vn avec l'autre, & en proposa les expediens au Conseil: mais